

嶗山志卷五

仙釋

道本於人事者也靜觀動察學貴實踐而崇尚虛無反經者所不道夫其等天地於逆旅眇光陰爲過隙此亦有所託而逃焉者嶗山處東南隅又半在海勝地名巖外多人跡所不至故修煉家時有也彼函關望氣葱嶺遺跡生各有地地各有人不得謂古今之不相及耳志仙釋第五

樂正子長不知何許人嘗遇仙於嶗山授以巨勝赤散方服之年過百八十顏如童入嶗深處不知所終

宋華蓋真人姓劉蜀人寓居嶗丹顏皓首不自知其年衣敝衣取掩形耳不冠不履冬不爐夏不扇一夕端坐化去神色自若其徒擇地葬之墓在高真宮前

元邱長春名處機棲霞人自號長春子爲兒時有相者謂其異日當爲神仙宗伯年十九爲全真學雲遊訪道勞山見其奇秀改名鰲山以爲棲真處元太祖嘗召見每言欲一天下必在不嗜殺人又言爲治在敬天勤民長生在清心寡欲嘗禱雨及退

嶗山志

卷五

仙釋

十六

共和印刷局印

熒惑皆有驗一日天大雲雷太液池岸北水入東湖聲聞數里池遂涸北口高岸亦崩處機曰山其摧乎池其涸乎吾將與之俱乎遂卒年八十元加贈長春邱真人

山史氏曰大哉長春子之言也其有古直臣之風矣夫一天下必在不嗜殺人聖世王佐不過如是元廷臣未有能言之者而出諸羽士之口曰敬天勤民清心寡欲亦足破泛海採藥求服食者之惑羽士也乎哉嗟乎世不明道未深察其本末見緇羽則非之曰吾惡其亂道也害治也而不知當塗之亂道害治滋甚胡不思所以闢之與

李志明王重陽之派孫元大德初杖履東來以清虛爲體明道爲宗見上清宮就圯嘆曰東海名山仙師遺蹟豈容泯滅非天不畀人人自棄耳與其徒除荆榛辟土鳩工重理殿宇居上清一紀復塊處明霞洞二十五年年八十步履輕健度弟子幾五百人後不知所終

雲高子姓劉名志堅博州人倜儻有材幹少事元永昌王掌鷹坊凡王命多任之故有劉使臣之稱嘗夢見一鬚翁曰奚爲不速去也又夢至一境山水幽深心自異之

忽悟棄家入道師事東平郭至空郭曰聞汝善養鷹夫學道亦若是矣鍛去野性久之調服自然合道遂唯而篤行辭郭而東至嶗山私喜曰機緣在是矣即山麓南阿爲椽虎狼旁午人咸爲危之曰獨不懼乎曰與物無競何憂何懼歲餘徙入深淵巔有大樹始面湖背樹趺坐倦則稍依樹旣而移身面樹背湖夜深忽墮湖下竟無所損素未嘗知書直述口號曰三十三上拋家計縱橫自在無拘繫來到嶗山下苦功十年得箇真氣力凡一言一行必踐其實誠則必明頗知休咎一日語衆曰爾曹勉旃善自修吾將逝矣當有聲震有鹿來門人請後囑答曰師真祕語俱在方策爾曹曾未一窺我生平只以實心行實事尙何言哉櫛沐端坐至夜月白風清果聲震鹿至悠然而逝年六十六門人葬華樓之凌煙崗今有墓在焉

徐復陽號太和子嘗師李靈仙得祕傳元元統間隱居鶴山鍛煉功成陽神靜出順帝召見賜錦爛之衣所著有近仙客詞遂仙去

明永樂間有張三丰者嘗自青州雲門來於嶗山下居之居民蘇現禮敬焉邑中初無耐冬花三丰自海島携出一本植現庭前雖隆冬嚴雪葉色愈翠正月即花蕃豔

嶗山志

卷五

仙釋

十七

共和印刷局印

可愛今近二百年柯幹大小如初或分其蘖株別植未有能生者又有張仙塔瀛壖石皆其歷蹟

齊道人者青之壽光人性僻耽靜來海上第二嶗之區盡而南兩峯矗立者爲南天門中有庵曰先天庵松蘿宛轉幽勝絕塵道人依之緘默自持喜焚酒藍縷蓬跣日啖糠粃一撮所餘粒悉炊之以果遊方之腹意于于甚適也爲庵重新帝宇三楹廊廂倍之皆躬親拮据其苦行人所不堪比有取庵左林木者衆難之道人解救焉贈以所伐之木使去天啟辛酉冬有老尼可九十凍若就死狀來求宿衆不納且揮之道人曰老人亦有性命此可避誰當不避因呼與處略無忌焉後尼屢顯異跡山居者乃習知非凡人尋亦不知其所往壬戌春正月道人忽語衆曰吾世緣已盡將從此逝矣恍失所在羽衆覓之至八仙墩則衲履在焉墩之下汪洋東溟也人謂道人水解云

崔道人修真黃石宮避人與其徒結茅古蹟島自耕食島在山南海中百餘里常爲蟒穴崔始居而蟒來以頭塞戶瞪目三日崔語之曰有宿怨當食我無則久居此何

爲旋去隱不復見世傳其事謂道力足以勝之也

慈山名德清南京報恩寺僧幼多宿慧十歲時與其母問答即有可惜一生辛苦到頭罷休之語令習舉子業經書子史入目能通長於詞賦然非其志棄而從事空門專心參究遂博明宗旨其所領悟即毫無住著嘗於淨頭識妙峯相期同遊妙峯果不凡再期之則先去矣越二年出遊至京師一時賢士大夫樂與之遊見妙峯遂相與俱去入五臺居北臺之龍山久之有得說偈曰瞥然一念狂心歇內外根塵俱洞徹翻身觸破大虛空萬象森羅從起滅嘗縱觀天下名山似無當者乃別妙峯東蹈海尋那羅延不可居至下清宮止焉初於樹下掩片席爲居七閱月土人張大心結廬使安之會有賜金三千爲建庵費曰吾三椽下容身有餘矣時大飢出濟之以廣上仁下清宮舊道院也傾圮甚羽流竄亡一二香火守廢基苦無藉念可建大法幢者此其機久之羽流益窘願資我多金舉地屬之於是走京師奏請內廷供奉於是出旃檀佛暨大部藏經畀之將奉比至大建梵刹曰海印寺於是教行而人歸者衆佛宇僧寮之盛幾埒於五臺普陀居數年道士耿義蘭者寺中有所謁見逆出怨言

嶗山志

卷五

仙釋

十八

共和印刷局印

訟於公見笞益怨乃指宮門詈曰慙禿覆楚予將秦庭七日哭而復爾也於是上變告慈山被誣戍雷州慈山固入道士處患若平居然所在說法皈依者衆及赦還復理曹溪匡廬年七十八卒卒之日沐浴端坐曰今日斬斷葛藤矣

山史氏曰道高而毀來忌之者多也釋氏子夫何忌而多口若是盛名難厭故君子惡其著耳吾觀慈山年譜而知慈山之所以爲慈山者其開宗明義已旣廓然四達了無生相矣胡勞勞人世爲豈借桴濟泝道當如是與嗟乎賢人君子多坎險雖道大如慈山而亦不免然彼小人者之流毒可勝道哉

仙釋補

自華上人四川夔州府奉節人俗姓譚生而靈異母徐氏夢老人奉藥一丸吞之是生上上人七歲時病夢觀音大士語以前因曰爾名海近有七世修持今不修後其墜矣上人答曰修矣乎今往修不知當從何處曰爾好修吾與爾修所遂至一青山處以柳枝酌酒洒面驚而寤得汗愈告母以夢求出家以其幼也入妙蓮寺此其近者師號青山適與夢孚異哉遂仍以海近名之年十二以聞見少不樂曰久居此

無爲也願出遊從客船至金陵居古林庵上人有夙知彌陀華嚴初未嘗學聞人讀即能誦居十五年乃遍歷名山叅證宗旨反諸身有實獲南至普陀住靜夜誦華嚴偶憶厨下缺水誦畢則室中水器皆盈過終南道逢虎阻行人難之有婦徑焉急欲歸不得上人至曰無懼也令隨之行虎伏不起有放生野羊相傳羊歲滿百迎於路伏跪若有乞請者上人知之授以三皈五戒去在登郡有書童二問其年大者十七小者十三各告其父母曰吾師至矣請從之弗許童曰吾今生託化未善吾其行也至夜端坐化去以此證上人七世修持果不妄晚年入墨欲於嶗山作歸宿慈霑其故知也請坐臘於吾家後亭先君子知其道力余且深重之頗相得遂住靜於嶗山磨嶺庵後於西蓮臺建蘭若傳戒六年武定寺僧請受律去而闡法示戒一日忽端坐說偈曰叵耐這個皮袋終身惟作患害撒手拋向塵沙一輪明月西邁遂化去弟子等扶柩東歸葬之蓮臺建塔於墓

慈霑上人觀陽里人也家姓李少孤事母孝性善悟喜談空門靜理以母在爲優婆誠樸無外飾邑紳宋朝請公嘉其篤實是入道器嘗爲說楞嚴上人時能解悟江南

嶗山志

卷五

仙釋

十九

共和印刷局印

講師一生者來觀陽說法與之語頗相投母卒遂祝髮師事之生公智辨人也霑上人力行愿恪受教惟謹初住地藏庵後徙盧鄉之園里寺不期年遂登座講諸大小乘經聽者常數百人及生公南還上人德譽日隆所度弟子踵相接殆無虛日先君子聞其名迎入墨與所建準提庵居之時加禮重上人潛心考道老而益勤於諸品經多所論述每談說娓娓足悅聽聞上人初不識字專力於此乃至理無不明人顧不當求省耶那羅延窟所稱在昔諸菩薩止息處者傳世久上人懼不修則漸而夷也曰思所自始託足於此者誰也而奉持者不能保有故陟乎吾責也吾責也謀之坦鳩工集事營殿宇設經閣禪室僧寮之居次第以舉誠於勞費故無下逮之力此所謂修其本者哉上人生平不爲苟得不募緣不畜幼童揚善掩惡言必信以非禮來者若罔聞見然居墨三十餘年未見有忌色曠語年八十四端坐化去

秋水居士曰造化之力粹精於專一者也夫惟專一故五官之用靜而不紛器虛而道生矣故誠無不明者慈霑初一鄉人耳無大智識而竭一誠以相向耳目心思皆効靈焉固知氣之所至形開神發天地萬物可呼吸通之耳彼工於外者志

繁而神不守於道何有哉吾謂禪門當以真誠爲本
論曰執其藝者習其事故山有木工則度之非工也操斤而往則意爲量耳二氏
之學余所未究意量焉亦有難安要之天下事未有不得之至誠而失之誕妄者
請質之知道君子

嶗山志

卷五

仙釋

二十

共和印刷局印